

25 SEP 2001

Mahathir-Setinggalan

35,000 UNIT RUMAH PANGSA UNTUK ATASI MASALAH SETINGGAN DI KL

PUTRAJAYA, 25 Sept (Bernama) -- Perdana Menteri Datuk Seri Dr Mahathir Mohamad hari ini mengumumkan rancangan kerajaan untuk membina 35,000 unit rumah pangsa bagi mengatasi sepenuhnya masalah setinggalan di Kuala Lumpur menjelang tahun 2003.

Bercakap pada sidang media di pejabatnya di sini hari ini, Dr Mahathir berkata kerajaan akan memindahkan penduduk setinggalan di Kuala Lumpur ke tempat yang lebih sesuai dan selesa.

Beliau berharap kerajaan dapat menyegerakan proses bagi menyediakan kemudahan kediaman itu.

Selain mengatasi masalah setinggalan, Perdana Menteri berkata kerajaan juga mempunyai rancangan untuk mengatasi masalah penjaja di Kuala Lumpur.

Katanya kerajaan telah mengeluarkan 5,000 lesen baru penjaja di Kuala Lumpur sebagai satu pendekatan membantu golongan berkenaan.

Perdana Menteri mengadakan sidang media itu untuk mengumumkan pakej RM4.3 bilion bagi merangsang pertumbuhan ekonomi dalam negara menjelang akhir tahun.

Dr Mahathir tidak menyebut jumlah setinggalan yang terlibat.

Bagaimanapun, beliau berkata kerajaan tidak dapat menyediakan kemudahan itu di kawasan yang dikehendaki setinggalan tetapi sebaliknya kerajaan akan menyediakan rumah pangsa di tanah kerajaan yang sedia ada.

"Saya berharap mendapat kerjasama pihak media supaya dapat memujuk setinggalan-setinggalan berpindah ke rumah pangsa," katanya.

Ditanya mengenai kemungkinan setinggalan baru mengisi kekosongan tempat yang ditinggalkan oleh mereka yang berpindah ke rumah pangsa kelak, Dr Mahathir berkata kerajaan akan merobohkan rumah-rumah yang ditinggalkan dan membina pagar bagi mengelak pencerobohan baru.

Ditanya mengenai kelemahan pihak berkuasa tempatan dalam menangani masalah setinggalan sebelum ini, Dr Mahathir berkata ia disebabkan tiada arahan khusus daripada kerajaan sebelum ini.

Memandangkan kini arahan sudah pun dikeluarkan, beliau yakin masalah itu akan selesai.

-- BERNAMA

AFY KHY MFJ LAT